

PWYLLGOR IAITH: 22 HYDREF 2024

YN BRESENNOL:

Y Cyngorwyr: Meryl Roberts (Is-gadeirydd)

Alan Jones Evans, Jina Gwyrfai, Olaf Cai Larsen, Elfed Williams, Rhys Tudur, Anne Lloyd Jones, Hefin Underwood a Peter Thomas.

Swyddogion: Vera Jones (Rheolwr Gwasanaeth Democratiaeth ac Iaith), Llywela Haf Owain (Uwch Ymgynghorydd Iaith a Chraffu), Llio Mai Dafydd (Swyddog Dysgu a Datblygu'r Iaith Gymraeg), Nia Lewis (Ymgynghorydd Iaith), Anthony Caradog Evans (Swyddog Iaith Cynorthwyol) a Rhodri Jones (Swyddog Gwasanaethau Democratiaeth).

HEFYD YN BRESENNOL:

- Eitem 5: Gareth Jones (Pennaeth Cynorthwyol yr Adran Amgylchedd) a Carwyn Meredydd (Uwch Swyddog Gweithredol).
- Eitem 6: Ffion Madog Evans (Pennaeth Cyllid Cynorthwyol - Cyfrifeg a Phensiynau) a Huw Ynyr (Pennaeth Cynorthwyol Technoleg Gwybodaeth).
- Eitem 7: Steffan Jones (Pennaeth Adran Priffyrdd, Peirianeg ac YGC) a Siôn Arwel Jones (Rheolwr Datblygu Busnes).
- Eitem 8: Rhys Meredydd Glyn (Pennaeth Cyfundrefn Addysg Drochi Gwynedd).

1. YMDDIHEURIADAU

Derbyniwyd ymddiheuriadau gan y Cyngorwyr Menna Baines (Cadeirydd), Elfed Wyn ap Elwyn, Llio Elenid Owen a Menna Trenholme (Aelod Cabinet Gwasanaethau Corfforaethol a Chyfreithiol), Dafydd Williams (Pennaeth Adran Amgylchedd) a Dewi Morgan (Pennaeth Cyllid).

2. DATGAN BUDDIANT PERSONOL

Derbyniwyd datganiad o fuddiant personol gan y Cynghorydd Rhys Tudur, gan ei fod yn aelod o Weithgor Polisi Cynllunio Gwynedd. Nodwyd nad oedd yn fuddiant sy'n rhagfarnu ac ni adawodd y cyfarfod ar gyfer yr eitem.

3. MATERION BRYD

Ni dderbyniwyd unrhyw fater bryd.

4. COFNODON

Llofnododd y Cadeirydd gofnodion y cyfarfod blaenorol o'r pwyllgor hwn a gynhaliwyd ar 25 Mehefin 2024 fel rhai cywir.

5. CYNLLUN HYBU'R GYMRAEG – ADRAN AMGYLCHEDD

Cyflwynwyd yr adroddiad gan Bennaeth Cynorthwyol yr Adran Amgylchedd a thynnwyd sylw'n fras at y prif bwyntiau canlynol:

Nodwyd bod natur rheng flaen yr Adran yn arwain at gyswllt dyddiol gyda'r cyhoedd a Chynghorwyr ac felly mae pob ymdrech yn cael ei wneud i hyrwyddo'r iaith o ddydd i ddydd, drwy waith a gweithredoedd y staff.

Cadarnhawyd bod polisiau'r Adran yn hyrwyddo a chefnogi'r Gymraeg gan fod ystyriaeth o'r iaith Gymraeg yn ganolog i ddatblygiad Cynllun Datblygu Lleol ar y Cyd. Ymhelaethwyd bod Polisi Cynllunio penodol mewn lle ar gyfer delio gyda materion ieithyddol gan nodi bod y Canllaw Cynllunio Atodol yn darparu arweiniad manwl pellach ar sut ddylai'r Gymraeg gael ei hystyried drwy gydol datblygiadau o bob math. Tynnwyd sylw bod y broses o ddatblygu Cynllun Datblygu Lleol newydd yn mynd rhagddo ar hyn o bryd fel un o flaenoriaethau Cynllun y Cyngor. Pwysleisiwyd bod y Gymraeg yn ganolog i ddatblygu'r Cynllun hwn.

Atgoffwyd yr Aelodau bod y Cabinet wedi cyflwyno Cyfarwyddyd Erthygl 4 ar draws ardal Awdurdod Cynllunio Gwynedd (gan nodi nad yw hyn yn cynnwys ardaloedd sydd o fewn ffiniau Parc Cenedlaethol Eryri). Adroddwyd bod angen caniatâd cynllunio i newid prif fan preswyl yn ail gartref neu lety gwyliau tymor byr ers i'r Cyfarwyddyd ddod yn weithredol ar 1 Medi 2024. Esboniwyd mai'r amcan yw cael gwell rheolaeth o'r stoc dai o fewn y Sir, gan gwrdd a diwallu anghenion tai trigolion Gwynedd. Ymhelaethwyd bod y Cyfarwyddyd yn fodd i gynorthwyo'r nod o gefnogi a hyrwyddo'r iaith Gymraeg.

Adroddwyd bod cryn dipyn o gynnydd wedi bod mewn ystadegau sgiliau iaith yr Adran yn y flwyddyn ddiwethaf, drwy'r holiadur hunanasesu. Nodwyd bod nifer uchel o staff yn weithwyr rheng flaen, megis y gwasanaethau Gwastraff ac Ailgylchu, ble nad oes ganddynt fynediad rhwydd i safle mewnwyd y staff. O ganlyniad i hyn cwblhawyd yr holiaduron hunanasesu gydag arweinwyr tîm er mwyn deall anghenion ieithyddol y gweithlu. Tynnwyd sylw bod 81.4% o staff yr Adran wedi cwblhau'r holiadur a bod 83.6% o'r gweithwyr hynny yn cyrraedd dynodiadau iaith eu swyddi. Cydnabuwyd bod yr Adran angen parhau i ddatblygu'r maes hwn ond hyderwyd y gwelir cynnydd i'r dyfodol wrth i'r gwaith barhau.

Clodforwyd ymdrechion staff i ddysgu'r iaith a gwella eu sgiliau ieithyddol.

Yn ystod y drafodaeth, cyflwynwyd y sylwadau a ganlyn:-

Tynnwyd sylw at ystadegyn o fewn yr adroddiad sy'n nodi bod 3 cais cynllunio wedi eu gwrthod yn rhannol oherwydd materion ieithyddol amrywiol a bod 13 cais cynllunio wedi derbyn caniatâd gydag amod ar gyfer mesurau lliniaru ieithyddol. Gofynnwyd am fwy o wybodaeth am ba resymau ieithyddol gall ceisiadau cynlluniau gael eu gwrthod a pha fesurau lliniaru ieithyddol all yr Adran ei osod ar geisiadau llwyddiannus. Mewn ymateb, cadarnhaodd Pennaeth Cynorthwyol yr Adran nad oedd modd rhannu manylion penodol am achosion. Er hyn, ystyriwyd byddai ceisiadau cynlluniau yn cael eu gwrthod oherwydd diffyg tystiolaeth am effaith y datblygiad ar yr iaith Gymraeg. Ymhelaethwyd y gall yr adran osod amodau lliniaru ieithyddol sy'n ymwneud â'r defnydd o enwau ac arwyddion Cymraeg. Pwysleisiwyd bod amod wedi ei osod ar 35 o geisiadau cynllunio llwyddiannus er mwyn sicrhau enwau Cymraeg ar fusnesau a dros 120 o dai newydd.

Atgoffwyd yr Aelodau nad yw'r Cyngor yn cynorthwyo unrhyw gais cynllunio gyda datganiadau ieithyddol nac unrhyw asesiadau eraill ar gyfer ceisiadau cynllunio, gan bod angen i'r Cyngor fodd yn ddiuedd. Cydnabuwyd bod datganiadau ieithyddol yn cael eu datblygu gan unigolion gyda thuedd i gefnogi'r ceisiadau cynllunio. Er hyn, pwysleisiwyd bod pob cais yn cael ei asesu a'i herio ar sail y dystiolaeth a gyflwynir. Cyfeiriwyd at yr angen am arweiniad cliriach a phendant gan Lywodraeth Cymru ar gyfer diwygio'r sefyllfa hon i'r dyfodol.

Gofynnwyd beth sydd ar waith gan yr Adran er mwyn asesu'r effaith y caiff Cyfarwyddyd Erthygl 4 ar y stoc dai yng Ngwynedd. Mewn ymateb i'r ymholiad, cadarnhaodd y Pennaeth Cynorthwyol bod fframwaith fonitro mewn lle a bod y gwasanaeth Cynllunio yn derbyn adroddiadau rheolaidd gan y gwasanaeth Trethiant er mwyn nodi newidiadau yn y farchnad wrth i amser fynd yn ei flaen. Ymhelaethwyd bydd modd cadarnhau os oes mwy o dai yn talu'r raddfa treth cyngor sylfaenol ac os yw defnydd tai yn newid wrth i'r broses hon barhau i'r dyfodol.

Ymholwyd a oedd y Pennaeth Cynorthwyol yn ymwybodol o unrhyw drafodaethau gan Awdurdodau Cynllunio eraill i gyflwyno Cyfarwyddyd Erthygl 4 yn y dyfodol. Mewn ymateb, cadarnhaodd y Pennaeth Cynorthwyol bod Parc Cenedlaethol Eryri wedi penderfynu eu bod yn ymchwilio i gyflwyno Cyfarwyddyd Erthygl 4. Adroddwyd bod y dystiolaeth a gwybodaeth sydd wedi ei gasglu gan Gyngor Gwynedd yn gymorth mawr iddynt wrth iddynt baratoi i gyflwyno'r Cyfarwyddyd a bod cydweithio clos rhwng y ddau Awdurdod. Nodwyd eu bod wedi cynnal ymgynghoriad ffurfiol a bydd penderfyniad terfynol yn cael ei wneud gan yr Awdurdod yn fuan.

Ystyriwyd nad yw staff rheng flaen gwasanaethau'r Adran, megis gwasanaethau Gwastraff ac Ailgylchu, yn adlewyrchu iaith y cymunedau maent yn ei wasanaethu mewn rhai ardaloedd o'r Sir. Nodwyd yr ystyrir heriau recriwtio i fod yn ffactor sy'n arwain at y broblem hon. Mewn ymateb i'r sylwadau, cytunodd y Pennaeth Cynorthwyol bod recriwtio yn heriol i'r Adran yn gyffredinol. Pwysleisiwyd bod yr Adran yn ymdrechu i ddelio gyda'r sefyllfa hon a gobeithiwyd bydd derbyn gwybodaeth o holiaduron hunanasesu sgiliau ieithyddol yn galluogi'r Adran i fynd i'r afael a'r sefyllfa i'r dyfodol. Ychwanegodd yr Uwch Swyddog Gweithredol bod diffyg hyder aelodau staff i ddefnyddio'r sgiliau ieithyddol sydd ganddynt hefyd yn cyfrannu i'r her hwn. Adroddwyd bod gwaith yn mynd rhagddo er mwyn annog pob gweithwyr i wneud defnydd o sgiliau'r Gymraeg sydd ganddynt eisoes.

Gofynnwyd a yw'r Adran yn defnyddio asiantaethau er mwyn hysbysebu ceisiadau am waith ynteu yw'r ceisiadau hyn yn cael eu gwneud yn fewnol o fewn y Cyngor. Mewn ymateb, cadarnhaodd y Pennaeth Cynorthwyol bod ceisiadau am waith yn cael eu gwneud yn ddwyieithog ac yn fewnol o fewn y Cyngor. Ymhelaethwyd bod yr Uwch Swyddog Gweithredol wedi bod yn datblygu pecynnau recriwtio er mwyn i fuddiannau'r Cyngor fod yn fwy deniadol i gwmnïau.

Ymholwyd am ddiweddariad ar ddatblygiad pecyn Tir a Môr ers cyflwyniad yr Adran i'r Pwyllgor Iaith yn 2023. Mewn ymateb, nododd y Pennaeth Cynorthwyol bod cryn dipyn o gynnydd wedi ei wneud ar y cynllun hwn gan fod yr Adran wedi derbyn adborth ei fod yn becyn gwerthfawr iawn. Ymhelaethwyd bydd defnydd o'r pecyn yn cael ei ledaenu gan fod Cyngor Sir Ynys Môn wedi datgan diddordeb i'w ddefnyddio. Sicrhawyd bydd data ar y pecyn hwn yn cael ei gyflwyno i'r Pwyllgor Iaith wrth gyflwyno diweddariad yr Adran yn 2025.

Diolchwyd am yr adroddiad.

PENDERFYNWYD

Derbyn yr adroddiad gan nodi'r sylwadau a dderbyniwyd.

6. CYNLLUN HYBU'R GYMRAEG – ADRAN GYLLID

Cyflwynwyd yr adroddiad gan y Pennaeth Cyllid Cynorthwyol (Cyfrifeg a Phensiynau) a Phennaeth Cynorthwyol Technoleg Gwybodaeth. Tynnwyd sylw'n fras at y prif bwyntiau canlynol:

Atgoffwyd yr aelodau o'r Cynllun Digidol a fabwysiadwyd gan y Cabinet ym mis Tachwedd 2023. Nodwyd bod yr iaith Gymraeg yn elfen ganolog i'r Cynllun ac yn cydnabod yr angen i gael darpariaeth Gymraeg ar gyfer unrhyw feddalwedd sy'n wynebu'r cyhoedd. Ymhelaethwyd bod pob ymdrech yn cael ei wneud er mwyn sicrhau darpariaeth Gymraeg ym mhob agwedd arall o waith y Cyngor hefyd. Cyfeiriwyd at yr Asesiad Addasrwydd Digidol sy'n cael ei ddefnyddio ar gyfer unrhyw gynnyrch sydd yn cael ei ddatblygu neu ei brynu gan y Cyngor, gan sicrhau bod yr iaith Gymraeg yn elfen bwysig o'r gofynion hynny.

Manylwyd bod yr Adran wedi canfod pecyn meddalwedd Gymraeg ar gyfer safle hunanwasanaeth Treth y Cyngor newydd, gan nodi nad oedd darpariaeth Gymraeg i gael yn y pecyn safonol. Eglurwyd bod hyn yn galluogi'r Cyngor i ddarparu'r safle yn ddwyieithog i'r cyhoedd pan fydd yn weithredol.

Pwysleisiwyd bod nifer helaeth o staff yr adran yn cyrraedd dynodiadau iaith eu swyddi. Ymhelaethwyd bod 2 aelod o staff yn derbyn hyfforddiant Cymraeg ychwanegol, gan gynnwys cwrs yn Nant Gwrtheyrn yn ddiweddar. Sicrhawyd bod gan bob aelod o staff rhyw fath o sgiliau Cymraeg o fewn yr Adran ac felly pwysleisiwyd bod pob gohebiaeth fewnol o fewn yr Adran yn cael ei rannu yn uniaith Gymraeg.

Cadarnhawyd bod yr Adran yn cydweithio gydag Archwilio Cymru ar hyn o bryd. Ymhelaethwyd bod yr Adran wedi cynhyrchu 6 pecyn o gyfrifon terfynol 2023/24 ar gyfer Cyngor Gwynedd, Uchelgais Gogledd Cymru, GwE ac Harbyrau Gwynedd. Eglurwyd bod Archwilio Cymru yn cynnal archwiliadau allanol manwl ar yr holl gyfrifon. Mynegwyd balchder bod Archwilio Cymru wedi penodi mwy o archwilwyr Cymraeg yn dilyn ymgyrch recriwtio diweddar, gan olygu bod cyfarfodydd yn cael eu cynnal drwy gyfrwng y Gymraeg.

Mynegwyd balchder bod yr Adran wedi llwyddo i ddenu hyfforddeion ar gyfer meysydd Cyllid a Thechnoleg Gwybodaeth a'u bod yn datblygu eu gyrfa drwy'r cyfrwng y Gymraeg.

Eglurwyd bod yr uned pensiynau wedi bod yn cydweithio gyda chwmni allanol er mwyn datblygu datganiadau fideo personol blynyddol Cymraeg. Ymhelaethwyd y golyga hyn bod person rhithiol o fewn y fideo yn tywys unigolion drwy ddatganiad blynyddol eu pensiwn, drwy gyfrwng y Gymraeg. Cydnabuwyd bod hyn wedi bod yn waith heriol i'r uned.

Nodwyd bod system hunanwasanaeth dwyieithog newydd i'r gronfa bensiwn wedi ei lansio ym mis Ebrill eleni. Mynegwyd balchder mai Cronfa Bensiwn Gwynedd oedd y gronfa gyntaf yng Nghymru i uwchraddio'r safle newydd gyda chymorth cwmni allanol. Cadarnhawyd bod y gwaith hwn yn lledaenu dros Gymru gan fod Cronfa Bensiwn Powys bellach yn ei ddefnyddio a bod cynlluniau pellach i gronfeydd pensiwn eraill ar draws Cymru uwchraddio i'w ddefnyddio.

Yn ystod y drafodaeth, cyflwynwyd y sylwadau a ganlyn:-

Esboniwyd yn yr adroddiad bod pob gliniadur sy'n cael ei ddarparu gan y Cyngor yn cael ei ddarparu gyda'r llwyfan weithredu wedi ei sefydlu yn y Gymraeg. Gofynnwyd a yw'r Adran wedi derbyn ystadegau pellach er mwyn gwirio'r nifer sy'n dewis parhau gyda'r gosodiad yn y Gymraeg. Mewn ymateb, cadarnhaodd y Pennaeth Cynorthwyol Technoleg Gwybodaeth bod 63% o'r dyfeisiau yn parhau i fod yn y Gymraeg gyda 37% wedi cael eu trosglwyddo'n ôl i osodiadau Saesneg. Sicrhawyd bod yr holl Benaethiaid Adran yn annog staff i ddefnyddio rhyngwyneb Cymraeg ar ei dyfeisiau ond cydnabuwyd nad oes modd ei wneud yn orfodol.

Llongyfarchwyd yr Adran gan fod 99.5% o staff yr Adran (218 aelod o staff) wedi cwblhau hunanasesiad ieithyddol. Gofynnwyd a oes gan swyddogion unrhyw arfer da y gellir ei rannu gydag Adrannau eraill y Cyngor i fwy o aelodau staff i'w lenwi. Mewn ymateb i'r

sylwadau, cadarnhaodd y Pennaeth Cyllid Cynorthwyol (Cyfrifeg a Phensiynau) bod trefniadau mewn lle i atgoffa'r Tîm Rheoli i atgoffa aelodau staff yn gyson yn hytrach na cheisio cynnal ymgyrch i gael pob aelod o staff i'w lenwi ar yr un adeg. Cydnabuwyd ei fod yn haws i swyddogion gysylltu gyda holl aelodau staff oherwydd bod gan fwy ohonynt gyfarpar technolegol, o'i gymharu â rhai o adrannau eraill y Cyngor sy'n delio gyda natur gwaith rheng flaen ble nad oes gan weithwyr liniaduron.

Diolchwyd am yr adroddiad.

PENDERFYNWYD

Derbyn yr adroddiad gan nodi'r sylwadau a dderbyniwyd.

7. CYNLLUN HYBU'R GYMRAEG – ADRAN PRIFFYRDD, PEIRIANNEG AC YGC

Cyflwynwyd yr adroddiad gan Bennaeth Adran Priffyrdd, Peirianneg ac YGC a'r Rheolwr Datblygu Busnes. Tynnwyd sylw'n fras at y prif bwyntiau canlynol:

Adroddwyd bod natur rheng flaen i waith yr Adran a bod gweithwyr yn dod i gyswllt yn aml gyda'r cyhoedd. Pwysleisiwyd disgwylir i'r mwyafrif o staff allu siarad Cymraeg i lefel derbyniol er mwyn gallu delio'n uniongyrchol gydag ymholiadau a darparu profiad gwell i gwsmeriaid o'r herwydd.

Darparwyd rhestr o wahanol hyfforddiant sydd wedi cael ei ddarparu er mwyn cynorthwyo staff i ddatblygu a meithrin ei sgiliau. Mynegwyd balchder hefyd bod yr Adran wedi llwyddo i ddenu prentisiaethau i feysydd peirianneg sifil, trydanwr a thechnegydd fflyd. Pwysleisiwyd bod yr iaith Gymraeg yn ganolog i'w datblygiad o fewn yr Adran.

Mynegwyd balchder bod 96.6% o staff yr Adran yn cyrraedd dynodiadau iaith eu swyddi. Nodwyd bod hyn yn gryn dipyn o gynnydd ers i'r Adran adrodd i'r Pwyllgor Iaith yn flaenorol a bod gwaith cyson wedi bod o fewn yr Adran er mwyn sicrhau bod gweithwyr yn cael y cyfle i gwblhau'r holiadur hunanwerthusiad. Ymhelaethwyd bod gwaith yn parhau o fewn pob gwasanaeth ar draws yr Adran er mwyn annog defnydd o'r iaith a magu hyder mewn sgiliau ieithyddol.

Nodwyd bod tri pheiriannydd o wasanaeth YGC yn aelodau ar fwrdd Technegwyr Myfyrwyr Graddedigion Sefydliad y Peirianwyr Sifil Gogledd Cymru. Ymhelaethwyd bod un o'r aelodau yn cadeirio'r grŵp gan adrodd ar faterion technegol i grwpiau eraill ar draws y Deyrnas Unedig yn gyson.

Cadarnhawyd bod cydweithio yn digwydd gyda'r Tîm Categori Amgylchedd a Thîm Cymorth Busnes y Cyngor er mwyn mynychu digwyddiadau ar draws y Sir. Eglurwyd mai'r nod y digwyddiadau yw codi ymwybyddiaeth am gyfleoedd ar gyfer isgontractwyr lleol i gofrestru ar restr Isgontractwyr y Cyngor neu i ddarparu gwasanaeth drwy fframweithiau'r Cyngor. Ymhelaethwyd bod gwybodaeth yn cael ei rannu fel rhan o Fwletin Cefnogi Busnes y Cyngor sydd yn cael ei rannu yn wythnosau. Gobeithiwyd cynnal digwyddiadau pellach gydag Adra, Adrannau'r Cyngor a mwy o fusnesau yn y dyfodol.

Adroddwyd bod yr adran wedi derbyn adborth cadarnhaol yn ystod Sioe Môn eleni yn ogystal â digwyddiadau gyrfaoedd. Nodwyd bod y rhain yn cynnwys sylwadau am wasanaeth sydd yn cael ei gyflwyno i drigolion yn ogystal â gwaith yr adran i hyrwyddo'r Gymraeg.

Yn ystod y drafodaeth, cyflwynwyd y sylwadau a ganlyn:-

Nodwyd bod yr Adran wedi derbyn nifer o gwynion am faterion megis arwyddion uniaith Saesneg. Gofynnwyd pa gamau mae'r Adran yn ei gymryd er mwyn lleihau niferoedd cwynion i'r dyfodol. Mewn ymateb, cydnabuwyd bod hyn wedi bod yn her yn ystod y flwyddyn ddiwethaf oherwydd bod yr Adran yn cydweithio gyda chontractwyr allanol arbenigol. Pwysleisiwyd bod cytundebau, erbyn hyn, yn pwysleisio'r angen i gyflwyno holl arwyddion ar gyfer safleoedd yn ddwyieithog a bod modd cyflwyno sancsiynau os yw'r amodau'r polisïau yn cael eu torri. Cadarnhawyd nad oes trafferthion wedi codi ers i'r newid hwn gael ei gyflwyno a bod yr Adran yn awyddus i adeiladu ar y gweithdrefnau hyn i'r dyfodol, gan ei fod yn anorfod bydd defnydd o gontractwyr allanol yn parhau oherwydd natur arbenigol agweddau gwaith yr Adran.

Diolchwyd am yr adroddiad

PENDERFYNWYD

Derbyn yr adroddiad gan nodi'r sylwadau a dderbyniwyd.

8. SESIYNAU YMGYSYLLTU I DRAFOD POLISI IAITH ADDYSG GWYNEDD

Cyflwynwyd yr adroddiad gan Bennaeth Cyfundrefn Addysg Drochi Gwynedd a thynnwyd sylw'n fras at y prif bwyntiau canlynol:

Eglurwyd bod yr adran Addysg yn cynnal cyfres o sesiynau ar hyn o bryd er mwyn trafod y Polisi Iaith Addysg bresennol. Nodwyd bod y sesiynau yn gyfle i drafod syniadau ac awgrymiadau sy'n ymwneud â'r polisi. Ymhelaethwyd ei fod hefyd yn gyfle i ystyried a oes angen diwygio'r Polisi Iaith Addysg bresennol yn dilyn canlyniadau Cyfrifiad 2021 yn ogystal â nifer o ddatblygiadau polisi ym maes iaith ac addysg yn genedlaethol.

Cadarnhawyd bod yr Adran wedi comisiynu Meirion Prys Jones (ymgyngorydd iaith llawrydd) i fod yn hwylusydd yn ystod yr holl sesiynau.

Adroddwyd bod rhai o'r sesiynau wedi cael eu cynnal eisoes ar draws Gwynedd, er mwyn derbyn mewnbwn gan benaethiaid ysgolion cynradd, uwchradd ac arbennig.

Nodwyd bod Pwyllgor Craffu Addysg ac Economi eisoes wedi ethol 5 aelod i fynychu'r cyfarfod ymgysylltu sef y Cynghorwyr Elwyn Jones, Jina Gwyrfai, Beth Lawton, Rhys Tudur a Richard Glyn Roberts.

Gofynnwyd i'r Pwyllgor Iaith ethol 5 cynrychiolydd ychwanegol er mwyn ymuno yn y cyfarfod ymgysylltu a gynhelir ar 4ydd Rhagfyr 2024.

Yn ystod y drafodaeth, cyflwynwyd y sylwadau a ganlyn:-

Cadarnhawyd bod y Cynghorwyr Menna Baines ac Elfed Wyn ap Elwyn wedi nodi eu dyhead i fynychu'r cyfarfod ymgysylltu, wrth gyflwyno eu hymddiheuriadau o'r cyfarfod hwn o'r Pwyllgor Iaith.

Mynegwyd diddordeb i fynychu'r cyfarfod ymgysylltu gan y Cynghorwyr Cai Larsen, Alan Jones Evans a Meryl Roberts.

PENDERFYNWYD

Ethol y Cynghorwyr Menna Baines, Meryl Roberts, Elfed Wyn ap Elwyn, Alan Jones Evans ac Olaf Cai Larsen i fynychu sesiwn ymgysylltu i drafod Polisi Iaith Addysg presennol y Cyngor ar brynawn y 4ydd o Ragfyr 2024.

Dechreuodd y Cyfarfod am 10:00yb a gorffennodd am 11:15yb.

CADEIRYDD